

Téerëe débpi biniyú unna won Pool bëy Tesalonik ra Kúnsëe

Pool daa bini bëy íli janji Tesalonik unni yeh. Tesalonik nék, di húmú gin gaan, bi hom hébis muluɓ te lom a yaay húmú títé nè lool, haanoh ala ñéerë' a pagadɗ bos húmú caakke na bal. Aya' Pool daaha ra, di cëgídté goomal bëewí gémúté Yéésú daaha, ndaa di maañay na ndah lahte yëwúɗdí hatlute ri, di kolohte saañce Bere (Saame Tílëdí apootarra 17.1-10).

Hompe nii filoon fe, di hom Korente, Timoote fa ñani na ñéerúu légéy rë ðeeffe ri daaha léhínté rí yee beya' ri Tesalonik ra (3.6). Unna léhínú Pool ra sosil keeña soslo níi di yampe na bini unni yeh, kéyrë'té wë bëy Tesalonik, na sím Koope di ðee na yeeluu bëewë hatni baaha bëy Tesalonik, bee lofuu wa pesadɗ ra (1.7-10). Di nérsëhté légéyë húmú légéy rí filib fi wa ra, na won ðee faha' ri waa olaat ra. Di gíníkké wë di yee na húmú halaatu wa sun fi kolohi ow búudé rë.

Di wonte wa :

- yii lenke ðee gémúu wë rë (1.2-10),
- yii lenke tílëdí di Tesalonik (2.1-12),
- yii lenke tílëdë faha' Koope ra (4.1-12),
- a yii lenke nimili Yíkëe (4.13 níi 5.11).

Bëyí fí janji téeríi bee béeb ay ot biti iña filib mín yúun bëewë lahu nuf ana di yii lenke dúmëení pesa ra. Di ay yúh biti bal bëewë gémú

Kiristaa na ra nonu bëy niiña, wa ham híin biti fayu raa, wani Yéésú nay home. Baa daa lukki lah solo !

Wodohi Pool bëy Tesalonik

¹ Don fi bëy ílí janii Tesalonik fa nonu bëewí Baap-Koo a Yéésú-Kiristaa Yíkée rë, so' mi Pool, funi Silaas a Timoote, fun na woduu ron. Koope líhë rën mal, on don jaamma.

Dee gémúu bëy Tesalonik Yéésú në rë

² Fun na símú Koope faraaah ndah don bééß, fun mësúy don hal fíliß ðañji fun.

³ Nuffi fun na koleeh don na biti fun home ðañji Koo, dí fi Boffi yen, di iña na pagu ron ndah gémë gémú ron Yéésú-Kiristaa Yíkée rë, a pagadon ndah faha' fahuu ron ri ra, a yaakaara dékúu rën lah ðii na ra.

⁴ Koy-yaayyi yee Koope faha'te ron yee ra, fun yúhúté biti daa ri tanis don,

⁵ ndah na waariyu fun don Uni Neba ra, húmú teyay won don, ndaa húmú ñéerè' a doole, a Ruuh-Pesen, a ngémí híinté. Don olute ðee húmú homuu fun don na, komi ron yii wunte don na ra maan ?

⁶ Te don, don ñeyute kotti fun a kotti Yíkée bee tahuu ron Una ra. Tahuu ron ri ra nék, don deyute coono ndaa Ruuh-Pesen tahte keeññon sosse.

⁷ Daaha, bëewë gémú te dékú Maseduwaan a Akaay ra bééß yeeluu don na.

⁸ Af don tahte unni Yíkée teyay Maseduwaan a Akaay don, ndaa hasla'te gina bééß ndah gémë

gémú don Koope ra hente lëyëŋ. Kon miteh fun wonle yin na.

⁹ Bëewë gonluu sun fi dee habuu don fun ayuu fun don na ra. Wa na wonu bal sun fi dee súugúu don yúullë don yíssúuté Koope na, jaamiyohi dī fa na pes te daa kaaf ka ra

¹⁰ a sehaalohi kola'i Koohi Yéésú sun cép feey ra. Di fi Yéésú fa dī kélícf dī búudé rë, sëmlë'té yen ní yen ay múc neebi Koope yiin bis-këem.

2

Tílëdí Pool di Tesalonik

¹ Koy-yaayyi yeh, don yúhruté affon biti sah aya húmú ayu fun ginon da pëtíh neh.

² Don yúhuté biti bal, balaa baaha fun maluute sol te fun ñeyute mok di Fílíp. Ayuu fun ginon da bal, fun maluute tolof tolof caak daaha, ndaa Koope habra'te fun níi fun waariyute ron Uni Neba te fun neehuy na dara.

³ Te na waariyu fun da bééβ, fun tíkúy wonni fun sun fi yii lahay, fun tíbúy në nuf bos, te fun saamuy na nofa' ow.

⁴ Fun kay, fun waariyuu Uni Neba dee faha' ri Koope ra. Di otte biti fun mínú rí, daa tah dī déŋéén fun dī. Fun saamuy yii neba' ow, fun saamu yii neba' Koope, dī fa na olsoh níβbí fun ra.

⁵ Don yúhuté biti fun mësúy jay ow, te fun mësúy ñeya' wonni fun fun saame yin ow na. Koope yúhté baaha !

⁶ Fun saamuy kañ ow na : don na neh te ow kay na neh ;

⁷ te añcaŋ, fun mínú ron cagoh koon don paŋ yee fahuu fun da ndah fun apootarriKiristaa, ndaa fun paguy ri ! Fun kay, fun soso soso filib fon ti belii na tooppitoh koyyi nen.

⁸ Pokoha pokuu fun don na ra tahte fun húmú teyuy waarii ron Uni Nebi Koope kep, fun bokute a don pes, ndah fun fahuute ron ní faha'.

⁹ Koy-yaayyi yeh, don nérsúuté dee húmú mokuu fun ní mok da maan ? Fun húmú légéyúu yii ñamun fun légéyëe na' a elek, kaa' fun mokil ow yínë sah don na, na húmú waariyu fun don Uni Nebi Koope ra.

¹⁰ Don mínú fun dñi seedeyid, te Koope mín fun dñi seedeyid bal biti dee tílúu fun a don fa gémú rë lante, júbpé te tíkëhté waal.

¹¹ Don yúhuté biti dee tílúu fun a ow fi ow don na ra bééβ, man hanndal baap a koyyi nen :

¹² fun líkínuté ron te fun onute ron doole, fun caguute don nda don pes pesada neba' Koope, dñi fa na dëek don, don non Nguur ki a ndami ra.

¹³ Yee tah fun ay dékée símí Koope ra biti bal : liiluu ron Un Koope fa komu fun don da, don habute ri, te don habuuy ri ti di na habuu un ow kese nen. Don habuu ri biti dñi Un Koope, te ri Un Koope kaah. Una ee paŋ yii wunte don fa gémú Yéésú në rë.

¹⁴ Koy-yaayyi yeh, don ñeyute kotti bëy ílì janii Yúdée yë gémú Koope te nonu Yéésú-Kiristaa na ra ndah di mokluu wa yëwúdfë, bëy ginon mokluu ron daaha bal.

¹⁵ Wa fi yëwúdfë hawute yonente ya húl, hawute Yéésú-Yíkëe, moklute fun ní mokil. Wa nebuuy Koope, fahiruy ow yin wun,

¹⁶ kadduute fun waarii heetti kayya Una mín tah wa múc dë. Wa homute na baatuu bakaad rek na suu ní bakaadfi wa mitte, neebi Koope keente sun fi wa.

Faha'i Pool nimil oli bëy Tesalonik

¹⁷ Koy-yaayyi yeh, fun nék fun húmú koluute don na fun suute, ndaa fun sayuy faraaah. Fun húmú lahuy fehey saañi fun, ndaa keeñni fun húmú kolaay don na. Fun húmú kosuuy biti fun ay ron tikil il, tahte lahay yii paguy fun nda yii baa mín lah !

¹⁸ Fun húmú habute biti nagajek fun ay nimil ginon, te so' mi Pool mi étídté rí i waal, ndaa Seytaane daa na yah waali fun.

¹⁹ Kon henay don moos, heneh ow kay ! Don daa yaakaari fun, don daa sësdu keeñni fun te don daa baanii ndama nay teebee biti fun bagute ní fun damoh fii Yéesú-Yíkëe yiin nay rii aye ra.

²⁰ Wa don kay ! Don daa ndami fun, te don daa sësdu keeñni fun.

3

¹ Sehuu fun ní fun mínlíh rë, fun olute biti yee gén dë daa ri biti funi affi fun tas Aten ndín,

² fun yeñ koy-yaafi fun Timoote don na. Di fi baa funi daa boku fun na légéyú a Koope, waarii Uni NebiKiristaa. Fun húmú yeju ri don na oni ron doole, nda don baatti híinndëh don ham ngémë,

³ ow di don na banti yeddoh ndah mokla na moklu don da. Don yúhruté affon biti sah yaa béeb non iña waayid yen Koope ra.

⁴ Nagajek, hómú homuu fun ðon na ra, fun hómú wonute ðon biti yen ay moklu, te ðon yúhúté biti daa ri yee lah woteh bee ra.

⁵ Yii baa daa tah seha' mi níi mi mínléh rē, mi yeñce Timoote ðon na kénséhí tígè teem ngémèn ðē. Mi hómú sídē' biti Seytaane fiir rēn, iña légyú fun ðon na ra bééβ sooy teem ðaaha.

⁶ Kola' Timoote ginon nimilte fun na ra, kompe fun unni neβpe keloh di yii lenke ngémèn a ðee fahuu ðon ow ra. Di wonte fun biti bal nuffon hómú homa' fun na faraah níi ðon ñamaasee, te ðon hómú sesuute oli fun ti di sesuu fun olaadi ron nen.

⁷ Don fi koy-yaayyi yi yeh, yii baa tahte homuu fun filiβ súfúñ fí fun a filiβ coono fi fun bééβ ðē, fun baatuutee lah doole ndah ngémèn.

⁸ Fun léeysíruté keeñ leegi hém daa ron habu híin Yíkēe nē.

⁹ Fun ay símée Koope dí níi mit ? Don tahute keeññi fun sosse níi sos fíyí !

¹⁰ Fun dékúu ðañi na' a elek, nda fun mín ðon tíkēet íl ngēey níi fun mitsid' yee tasa' ngémèn ðē.

¹¹ Démíin Koope, dí fi Boffi yen, a Yéésú Yíkíi yen parid' fun waala yulid' ginon ða !

¹² Yíkēe ona ron, ðon baatee fahanta' hanndal kon níi tígí teem fahanta', a hanndal ki ðoni bëewē bééβ ti di fahuu fun ðon nen.

¹³ Hen ðaaha raa, Yíkēe ay ron on doole níi yiin nay aye Yéésú Yíkíi yen, ñéerē' a bëewí bééβ rē, ðon lan ces níi ðon lēhíh yii wonun sun fon, ðon caga' wun fíi Koope, dí fi Boffi yen.

Tílèdè faha' Koope ra

¹ Leegi nék koy-yaayyi yeh, fun teebute ron dee waruu ron pesa' níi don neba' Koope ra, te fun yúhúté bití don pesuu ðaaha níi a ðeh. Kon fun na líkínú ron te na ðagu ron di tii Yéésú-Yíkèe bití don baatti ham híin,

² ndée, don yúhúté túuyè' yè teebu fun don ra, te wa ðúhè' Yéésú-Yíkèe nè.

³ Koope faha' bití don lan, te lani baa daa ri bitih : don moytoh paŋ yii tappe njaaliyoh béeb,

⁴ ow fi ow don na béeb ham afi sùtèrèl faani, ñéerè' a lan*,

⁵ fah-beleb ðan ðii kùrèelèh ti bëewè nènìh bëewí Koope ra nen, wa fa yíih Koope ra.

⁶ Ow ðanay tooñ moroomi filib yee wonu baa ra ndín leb yii daa ri laha' ri. Fun húmú wonute don bití Yíkèe ay keen sun fi bëyí paŋ mani pagadfi yah.

⁷ Koope dèekèy yen paŋ yin bos, ði túuy yen lan.

⁸ Kon bëyí faaliyaay yee wonu baa ra, ðeef ði faaliyaay won ow neh, ði faaliyaay Koope fa on don Ruuh-Pesen ða.

⁹ Yii lenke fahanta' hanndal kon, miteh ow won don yin na, Koope yèedídté don baaha níi wocce.

¹⁰ Daa ri yee teebu don koy-yaayya Maseduwaan béeb ðè, ndaa kaa'eeh fun won don bití don baat ya' yon,

* **4:4 4.4** *ow fi ow don na béeb ham afi sùtèrèl faani, ñéerè' a lan* :Lahte bëewí habuu ri ðeh : *ow fi ow don na béeb koloh saam beleb raa, lah ñeyaa ri waal.*

¹¹ don paŋ béeb don pesa' jaamma, ow fi ow don na béeb tooppitoh iñi afi, don yuloh légéy don kúdf affon, ti di húmú wonuu fun don dī nen.

¹² Hen dāaha raa, bēewē gémúy rē ii ron yap te don ii seh dara ow na.

Yiin nay nimile Yíkēe rē

¹³ Koy-yaayyi yeh, fun fahuu biti don yúh yee homuu bēewē húlúu a ngémí wē Kiristaa na ra, don banti tik misiga keeññon níi lukus ti bēewí kayya lahuy yaakaar ra nen.

¹⁴ Yen gémú biti neh Yéesú húlté te ri kolohte búudé è ? Ti dāaha nen, yen gémúté biti bal Koope ay kélídf bēewē húlúu a ngémí wē Yéesú nē rē.

¹⁵ Cēe fun bílídf don yee won Yíkēe rē : bēewē nay lísée pes yen na níi a baaha ra, wa fa nay maasee nimili Yíkēe rē, wa ii kèllēh bēewē húlú rē.

¹⁶ Yiin fin fa, wa ay keloh uni diŋke, un kélfē malaaka a un kúlúf ki Koope tiil, dī fi Yíkēe kola' sun cépé. Bín fē rēe, bēewē húlúu a ngémí wē Kiristaa na ra nay dēbēe koloh,

¹⁷ bēewē nay lísée pes níi a baaha ra, anti béyrú wa ñéerē' a wa filiḅ nérrē, wa tee'ee a Yíkēe sun. Hen dāa raa, yen fa gémú dīi na ra béeb yen hom a dī faw.

¹⁸ Kon, lah ènëntíi doole a unni yah.

5

Nimili Yíkēe sheuun a teey

¹ Koy-yaayyi yeh, di yii lenke wahtaa a jamaanaa nay nimile Yíkëe rë nék, miteh fun won don yin na,

² ndah don yúhruté affon biti yiin nay nimile Yíkëe rë ay beettiya' ti lohoh elek nen.

³ Tígë nay habee bëewë biti homuute jaamma, lahuy dara yii sídúun wë rë, gina ay yípée bëp affi wa daaha, ti di na yíppi haba' loo beleb nen. Ow ii naa mín fús.

⁴ Ndaa don fi koy-yaayyi yeh, bi homuy don ñúusë, bisi baa ii ron beetti ti di na beettiya' lohoh nen.

⁵ Nagajek don béeb, don nonu bëy niiña, don tílú na'. Yen nëníh bëy elga, bëy ñúusë.

⁶ Kon, yen banuy nee' ti di na nee'uu bëewí kayya nen ; yen yeelun yen teey.

⁷ Bëewë në nee'u ra nee'uu elek, yee na maniyu ra maniyuu elek,

⁸ ndaa yen fa na tílú na' ra, yen warun teey teeyo. Yen habun ngémë, yen faha' ow wa hen búub túl yen na, yen haba' yaakaari mújë baane haa'aa yen na. ⁹ Ndée nagajek, Koope cagay biti dī ay kéeníd neebi sun fi yen, dī caŋ biti yen haal mújë nay onee Yéesú-Kiristaa Yíkëe rë.

¹⁰ Kiristaa húlídté yen. Daaha, bisa nay rii nimile ra deefa yen pesun peso mbée yen húlún húlë béeb, yen ay pes a dī.

¹¹ Kon bëetí onanta' doole, don tojanta' filib ngémë ti di na pagantuu don dī nen.

Iña millúu wëe túuy dë

12 Koy-yaayyi yeh, leegi fun fahuu biti bëewë homu filiḅ fon na moku, Yíkëe nah wa níidí ḁon a líkíní ḁon ra, ḁon yed' wa cér.

13 Hëbí wë, ḁon faha' wa níi faha' ndah légéyí wë. Pésíi jaamma filiḅ fon.

14 Koy-yaayyi yeh, fun ee ron wonu ra ee : líkíní ḁëpësíddë, ḁon ben bëewë neehu ra, ḁon habra' bëewë gooyu ra, ḁon mújíd bëewë béëḅ.

15 Mëytíi yíllëntë' bos filiḅ fon ; sëemí wuna faraah hanndal kon a hanndal ki ḁoni bëewë béëḅ.

16 Pésíi sos-keeñ faraah,

17 ḁon déké' ḁaṅ.

18 Yii mín ḁon homa' béëḅ ḁon sím Koope. Baa daa yee faha' ri pesi ḁon fa nonu Yéésú-Kiristaa na ra.

19 Ngënë këe'íi pagadfi Ruuh-Peseṅ,

20 ngënë hégíi unna léhínú kola' Koope na ra.

21 Kénsíi wë béëḅ, ḁon ham yee wun ḁa ;

22 yii hente bos béëḅ ḁon moytoḁ ri.

23 Di fi Koope fa na ona' jaamma ra ladla ḁon ces ; ḁí níirë níbbën, níid' keeññon a faannon béëḅ níi ow laheh yii wona ri ron, yiin nay nimile Yéésú-Kiristaa Yíkíi yen ḁa.

24 Koope fa dëek ḁon ḁa, yii won ḁí béëḅ ḁí paṅ ri, te ri ay ron rii pagiree ḁaaha.

25 Koy-yaayyi yeh, lah ḁëgírí fun bal.

26 Lah wëddí fun koy-yaayya béëḅ níi wodoh*.

27 Mee ron rii won ra ee di tii Yíkëe, lah léhíní wë béëḅ unni yah.

28 Yéésú-Kiristaa Yíkíi yen líhë rën mal !

* 5:26 5.26 Di baahi bëewí yaaha, wa yahti wodoh bëewë mboko yi wa mbée bëewë meeru wa raa, wa fëenúu wë fëenëe.

Séréel Ndút: Unni Koope

Ndut: Séréel Ndút: Unni Koope (New Testament+)

copyright © 2020 Wycliffe Bible Translators, Inc.

Language: (Ndut)

Contributor: Wycliffe Bible Translators, Inc.

All rights reserved.

2020-11-20

PDF generated using Haiola and XeLaTeX on 28 Dec 2024 from source files dated 29 Jan 2022

a3a1238b-9393-5875-a4c5-1d3f38537bfe